

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : **JAWAB LISAN**

DARIPADA : **TUAN M. KULASEGARAN**
[IPOH BARAT]

TARIKH : **10 JUN 2014**

SOALAN : **Tuan M. Kulasegaran [Ipoh Barat] minta
MENTERI LUAR NEGERI menyatakan:-**

(a) jumlah sumbangan yang telah disumbangkan oleh Malaysia untuk sekretariat Komanwel; dan

(b) adakah sumbangan akan diberhentikan atas sebab-sebab penyalahgunaan (*abuse of human rights*) hak asasi manusia oleh Sri Lanka.

JAWAPAN

Tuan Yang di-Pertua,

Saya ingin mengucapkan terima kasih kepada Yang Berhormat Ipoh Barat atas soalan beliau.

2. Untuk makluman Dewan yang mulia ini, Malaysia telah menjadi negara anggota Komanwel sejak tahun 1957. Sebagai salah sebuah daripada 53 negara anggota Komanwel, Malaysia tidak terkecuali daripada memberi sumbangan tetap secara tahunan kepada pertubuhan tersebut. Kadar sumbangan ini ditentukan oleh Sekretariat Komanwel pada setiap tahun (jadual sumbangan tahunan Malaysia kepada Sekretariat Komanwel adalah seperti di Lampiran), bagi menampung operasi Sekretariat Komanwel dan lain-lain aktiviti anjuran pertubuhan tersebut seperti program-program pembangunan belia dan program-program di dalam pelan strategik Komanwel.

Tuan Yang di-Pertua,

3. Pertubuhan Komanwel secara umumnya menyokong usaha-usaha mempertahanan dan mempromosikan hak asasi manusia di kalangan ahli-ahlinya. Walau bagaimanapun, ia tidak mengambil apa-apa pendirian spesifik berhubung situasi hak asasi manusia di Sri Lanka. Sehingga kini, walaupun Sri Lanka tidak tersenarai di dalam agenda, dengan izin, *Commonwealth Ministerial Action Group (CMAG)*, namun, Komanwel tetap memainkan peranan penting dalam membantu Sri Lanka menangani isu-isu hak asasi manusia, termasuklah pemberian

sokongan teknikal bagi meningkatkan kebebasan Suruhanjaya Hak Asasi Manusia dan Suruhanjaya Pilihan Raya.

4. Walau bagaimanapun, Kerajaan Malaysia memandang serius dakwaan-dakwaan berhubung pencabulan hak asasi manusia serta kerosakan harta benda yang dilaporkan berlaku sepanjang konflik di Sri Lanka. Dalam hal ini, Kerajaan percaya bahawa penyelesaian terbaik bagi mengatasi situasi hak asasi manusia di Sri Lanka adalah melalui proses dialog dan kerjasama konstruktif di antara komuniti-komuniti di Sri Lanka. Usaha yang sedang dilakukan oleh Kerajaan Sri Lanka dalam, dengan izin, *national reconciliation* haruslah disokong oleh masyarakat antarabangsa.
5. Mengambil kira perkara tersebut, Kerajaan ingin menyatakan bahawa situasi di Sri Lanka tidak mempengaruhi atau menjelaskan keputusan Kerajaan untuk meneruskan sumbangan tahunan Malaysia kepada Sekretariat Komanwel.

Sekian, terima kasih.

NO. SOALAN: 17

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : TUAN ANUAR BIN ABD. MANAP
[SEKIJANG]**

TARIKH : 10.06.2014 (SELASA)

SOALAN :

Tuan Anuar bin Abd. Manap [Sekijang] minta PERDANA MENTERI menyatakan :-

- (a) apakah kriteria utama untuk mengisi 22 jawatan pakar luar dalam Suruhanjaya Pencegahan Rasuah Malaysia (SPRM); dan
- (b) apakah statistik penyelesaian kes oleh pakar luar ini berbanding kes yang dilaporkan.

JAWAPAN: YB SENATOR DATUK PAUL LOW SENG KUAN
MENTERI DI JABATAN PERDANA MENTERI

Modal insan memainkan peranan penting dalam kejayaan sesebuah organisasi. Selaras dengan tuntutan ini, transformasi SPRM telah dilaksanakan bagi memacu SPRM ke arah berprestasi tinggi. Salah satu transformasi yang diperkenalkan iaitu Transformasi Modal Insan di mana berperanan mewujudkan pegawai SPRM yang sesuai, lengkap dengan set kemahiran yang diperlukan dan tepat pada masanya untuk mendapatkan hasil yang mantap. Sejajar itu juga, pengetahuan dan kepakaran dari luar amat diperlukan bagi tujuan pemindahan kepakaran dan ilmu pengetahuan. Oleh itu sebanyak 22 jawatan telah dikenalpasti untuk diisi oleh tenaga pakar daripada luar. Tenaga-tenaga pakar luar berkenaan akan diambil selama dua tahun di bawah skim perkhidmatan *contract for service*.

Kriteria pemilihan dalam pengisian pakar luar di SPRM bergantung kepada kepakaran dan kapabiliti individu tersebut untuk mengisi keperluan atas inisiatif-inisiatif yang sedang dan akan dilaksanakan oleh SPRM. Tenaga Pakar yang dilantik mempunyai kelulusan, kelayakan, pengalaman dan kemahiran dalam bidang berkaitan. Setakat ini, seramai 17 jawatan Tenaga Pakar telah ditempatkan di SPRM iaitu:

- Bahagian Operasi Khas (1 jawatan)
- Bahagian Perakaunan Forensik (4 jawatan)
- Bahagian Komunikasi Strategik (6 jawatan)
- Penasihat Undang-Undang (2 jawatan)

- MACA (1 jawatan)
- Unit Modal Insan Strategik (3 jawatan)

Daripada 17 pengisian jawatan pakar luar ini, hanya 7 pakar di 2 Bahagian sahaja yang berperanan dalam tugas-tugas operasi dan siasatan iaitu Bahagian Operasi Khas dan Bahagian Perakaunan Forensik. Kemasukan pakar-pakar ini adalah untuk membantu melakukan pemindahan pengetahuan (*transfer of knowledge*) selain membantu kes-kes yang melibatkan forensik kewangan dan *asset tracing*.

Peranan pakar-pakar bukanlah secara terus kepada kes-kes kerana mereka tidak menjalankan siasatan tetapi membantu dari aspek kepakaran atau pengetahuan mendalam mengenai isu dalam siasatan terutamanya berkaitan dengan perakaunan kompleks atau perjalanan operasi syarikat swasta. Dengan adanya tenaga pakar, pegawai penyiasat SPRM mendapat bimbingan dan nasihat dalam urusan siasatan yang berkaitan.

Sekian, terima kasih